

Innarluuteqarnermut paasinnittaaseq aamma paqumisunneq

Tiliup 2017-imi pilersinneqarneraniilli inuit innarluutillit naapittakkagut, suleqatigisartakkagut aamma pisinnaatitaaffimminnik siunnersoqqullutik saaffiginnittartut inuttut allatuulli ataqqineqarlutik pineqartarnissartik kissaatigisaraat paasisarparput.

Paasisitsiniutigisatsinni videoni peqataasartut soorlu ukunani "Ersinngitsumik innarluutiga" aamma "Suleqataavunga" qanorluuniit assigiinngitsigisunik pissutsimikkut piginnaasakillisimangaluarunik tamavimmik paasineqarnissartik kiisalu inuaqatigiinni akuerineqarlutik pineqartarnissartik kissaatigisarpaat. Allatuulli inuaqatigiinni aningaasarsiornikkut, kulturikkut aamma inooqataanikkut kiffaanngissuseqarlutik peqataanissaminut periarfissaqartinneqarusuttarput.

Nunatsinni innarluuteqarnermut isummat, tassa Iiisimatusarfiup Tiliullu suleqatigiillutik inuaqatigiinnik isumasiuilluni 2020-mi misissuinerani paasinarsivoq, apersorneqartut 1000-t akornanni 18 procentit nammineq innarluuteqartutut imminnut nalilertut. Tassa misissuinermi ima aperigaangatta: "Illit nammineq innarluuteqarpit?" akisut 18%-ii angertarput. Taamaalilluni apersorneqartut tallimaagaangata ataaseq innarluuteqarnerartarpoq, kisitsisillu Naalagaaffiit Peqatigiit peqqinnissaq pillugu suleqatigiiffiata (WHO)-ip naliliineranut qanipput, tassami nunarsuup inusa 15%-ii innarluuteqaramik (World Health Organization, 2015). Aammali una maluginiagassaavoq innuttaasut 46 %ii inummik innarluutilimmik ilaquaqarpus, tassa soorlu anaana, ataata, aanaa, aataa, qatanngut, qitornaq asasarluunniit innarluuteqartuuusinnavoq. Inuillu 79 procentii inummik innarluutilimmik ilisarisimasaqarpus, tassa tamangajassuatta inummik innarluutilimmik peqateqarnermk arlaatigut misilittagaqarpugut.

Inuaqatigiinni innarluuteqarneq pilersinneqartarpoq

Innarluuteqarneq Naalagaaffiit Peqatigiit innarluutillit pillugit isumaqatigiissutaanni aalajangersimasumik nassuiarneqanngilaq, kisianni allaaserineqarpoq, tassa Innarluutillit pillugit Isumaqatigiissummut Naalagaaffiit peqataasut, soorlu Kalaallit Nunaannit 2012-imi akuerinnittut tamarmik angerpaat, innarluuteqarneq taaguutaasoq ineriartortinneqartoq. Inunnut innarluutilinnut ilaapput inuit timikkut, tarnikkut, silassorissutsimikkut imaluunniit misigissutsimikkut piginnaanikillisimasut, piginnaasanik matussusisut allat sunneeqataanerisigut inuit allat assigalugit inuaqatigiinni tamakkiisumik peqatasinnaanerannik akornusiisinnaasut. Tassa inuk pissutsimigut piginnaanikillisimasoq innarluuteqarnermut kisimi peqqutaatinneqanngilaq, kisianni inuaqatigiinni akimmiffiit pilersinneqartut, soorlu avatangiisini aamma inuit isummersortarneri kiisalu quisuariartarneri aalajangiisuupput inuk innarluuteqarnermk misigitinneqassappat.

Taamaasilluta inuaqatigiinni inuttut ataasiakkaatut isummat pigiliussagut imaluunniit pitsaanngitsumik innarluuteqarnermut isummertarnigut allanngortissallugit akisussaaffeqarpugut, taamatummi isumaliortaaseqarnerput inuup piginnaasakillisimasup tamakkiisumik kiffaanngissuseqarluni inuaqatigiinni allaatuulli peqataanissaanut periarfissaanut

sunniuteqarnerluttarmat. Aammali isumaliuutigisariaqarparput inuiaqatigiinni avatagiisit amerlanerpaanit peqataaffigineqarsinnaanersut imaluunniit tikikkuminartuunersut.

Innarluuteqarneq pillugu paqmisunneq

Tiliup paasisassarsiorluni Qaanaamut kiisalu Kommune Kujallermut angalanerini taakkunanilu inuit innarluutillit naapinnerini, siullerpaamik innarluuteqarneq pillugu saqqummertunik aamma misigisaqarfiusarput. Arnaq isigjarsuttunngorsimaninni pillugu siullerpaamik allat tusaasut saqqummerluni oqaluttuarpoq, isingiasuttunngorsimanini assut kanngungisimallugu, allaat ilaqtuttaminut ikinngutiminulluunniit isigjarsuttuunini pillugu ikioqqusarsimanani, isertuussininilu pillugu angerlarsimaffimmini kiserliortarluni. Angut aamma oqaluttuarpoq atuartuunermini allannermik atuarnermillu ilikkangitsoorsimanini isertugaatigalugu, tassalu naqinnernik ilisarinissinnaasimanngikkuni tamanna kanngungalugu.

Nunatsinni innarluuteqarneq eqqartorneqartillugu qanoq annertutiginera aamma erseqqissarniarneqartarpoq. Taaguutit uku ilaatigut atorneqartarput "Innorluut" aamma "innarluutillit". Innorluut atorneqartillugu erseqqissarniarneqartarpoq, inuk "akornuteqareerluni" inunngorsimasoq qularnaatsumillu tassa inuunermi sinnera ikiorneqassasoq kiisalu tapersorsorneqassasoq. Innarluutillillu pineqartillugit, taava inuunerup ilaani innarluuteqalersimasutut isigineqartarput, taakkulu qanoq annertutigisumik ikiorneqassanersut tapersorsorneqassanersullu nalilersorneqartassasut.

Inuit inuunerup ilaani innarluuteqalersimasut, soorlu napparsimanerup kingorna, ajutoornermi imaluunniit aanaartoorerup kingorna innarluuteqalernertik pillugu akueriuminaatisisarput oqaasinnguiuminaatisisarlutillu. Aperineqarunik qanoruna pisoqarami? Taava toqqaannaq nassuaanatik akisarput "taamaattunngorama" (oqaratik innarluuteqalerama). Itinerusumillu nassuaanatik nipangertarput tamatuminngalu eqqartuineq unitsiinnarlugu. Aammali inoqartarpoq piginnaankillisimasunik imminnut innarluutilittut taajumanngitsunik, isumaqartulli inuunerup atugassarititaanik atugaqarlutik.

"Innarluuteqarnermut isummat" takutippaat, inuit 61%-iisa inuit innarluutillit pilligit pigiliutiinnakkaniq isummertarsorigaat. Tassanilu 12 procentiinnai akipput taamaattoqanngtisoq. Misissuinermitaaq takutinneqarpoq inunnut tarnikkut innarluutilinnut tunuarsimaarnerusoqartartoq illuanik timikkut innarluutilinnut akuersaarnerusoqartarluni.

Nunani tamalaani misissuisarnerni aamma ersersinneqartarpoq isummat pigiliutiinnakkat inunnut innarluutilinnut nuanninngitsumik tuttartut, taamatullu isummersuutinut upperinnilersartut, naggataatigullu inuttaanut pitsaanngitsumik sunniuteqarnerluttarlutik. Danmarkimi misissuinerup takutippaa, inuit innarluutillit inunnut innarluuteqanngitsunut sanilliullugit imminnut tatiginnginnerusartut soorlu suliffissarsiorniarnerminni (Thulesen og Salado-Rasmussen, 2020) aamma Europarådet 2003-mi misissuinerminni takutitsivoq, arnat innarluutillit tunniussaqarsinnaasutut kiisalu suliffeqarnermut tunniussaqarsinnaasutut naatsorsuutigineqannginnertik sunnertiffigisaraat (Beluza, 2002).

Nunatsinni immikkoortitsisarnermut suli inerteqquteqanngilaq

Inuit pisinnaatitaaffii pillugit siunnersuisoqatigiit, inuit pisinnaatitaaffii pillugit institutti aamma Inuit innarluutillit illersuisoqarfiat Tilioq saqqummersitanilu assigiinngitsuni inassuteqaatigisarpaat, inatsisartut naalakkersuisullu inunnut innarluutilinnut immikkoortitsisarnerup inerteqqutinngortinneqarnissaannut inatsisilioqqullugit.

Danmarkimi 2004-mi suliffeqarnermi innarluuteqarneq peqqutigalugu immikkoortitsisarneq inerteqqutinngorlugu inatsisiliortoqarpooq, soorlu atorfinititsinerni aamma soraarsitsinerni immikkoortitsisoqartannginnissaa siunertaalluni.

Nunatsinni sulisitsisut sulisut 120-ni napparsimallutik sulinngitsoorsimappata soraarsissinnaangaat inerteqqutaanngilaq, Tiliutut saaffiginnissuteqartut ilagaat inuk innarluutilik, suliffimminiit soraarsitaanermi kingorna inimik attartukkaminit anisitaasoq, tassa aanaartornermi kingorna napparsimalluni uninnganermi nalaani sulisinnaasimannnginnami taamaasillunilu inimut akiligassaminut malinnaasinnaajunnaarluni.

Peqataatitsineq aamma tikikkuminassuseq pillugu paasisaqarnerulerit, inuaqatigiinnilu akimmiffiit piiarlugit

Inunnut innarluutilinnut akimmiffiusartunut tamanut piaaniarnermi malittarisassanik kiisalu aaqqiissutissanik tamatigut atorneqartuaannarsinnaasunik soqangnilaq. Inuit innarluutillit tamavimmik assigiinngitsunik pisariaqartitaqarput kiisalu inuaqatigiinni peqataaniarunik, soorlu ilinniagaqarlutik, suliffeqalernissaminnut imaluunniit namminerisamik aalajangiussisinnallutik kulturikkut imaluunniit sunngiffimmi sammisassamut peqataaniarunik qanoq aaqqiisoqarsinnaaneranik assigiinngitsorpassuarnik siunnersuuteqarsinnaapput. Tiliumiilli assigiinngitsunik inassuteqaateqarsinnaavugut, inuit, qinikkat aamma kulturikkut suliaqartut inuaqatigiinni peqataatitsinerunissamut tikikkuminarnerunissamullu iliuuserisinnaasaannik:

- Inuttut nammineq paasisaqarnerulersinnaavutit, inuit innarluutillit pisinnaatitaaffiinut tunngasunik soorlu tilioq.gl-imi ilisimasaqarfimmi saqqummersitanik atuarlutit, imaluuniit paasisitsiniutnik isiginnaarlutit.
- Kulturikkut sunngiffimilu sammisassaqtitsisut isumaliuutigisinnavaat neqeroorutigisartik tamanut tikikkuminartuunersoq. Soorlu isaariamut majorallaqarnersoq misissorlugu, matut ammaruminaattuunersut imaluunniit matut namminneq ammarsinnaanersut? Sammisassamut paasissutissatut saqqummiussaq paasiuminartuunersoq? Radiokkut atuarneqarluni saqqummiunneqarpa? Nutserisussamik periafissaqarpisi? Aamma ussorsorluni nutserisinnaasoq? Timersoqatigiiffimmi meeqqat innarluutillit ilaasortaanissaminnut periafissaqarpat aamma inissaqartinneqarpat?
- Sulisitsisut atorfinnut inuttassarsiunermanni kaammatuissassasut, suaassuseq, ukiut, upperisaq imaluunniit inuaassuseq imaluunniit innarluuteqarneq apeqquaatinnagit atorfimmut qinnuteqarsinnaasut, kiisalu sulisoqarnermi peqataatitsiumasumik politikkiliussasut.
- Inatsisartut naalakkersuisullu innarluuteqarneq pillugu immikkoortitsisarneq inerteqqutinngorlugu inatsisiliussasut

Sammisami tigulaariffiit aamma annerusumik paasisaqarfingineqarsinnaasut ukuupput:

Beluza, M. 2003. Discrimination against Women with disabilities. Council of Europe Publishing.

Bonfil, I. S. og Olsen, L., 2013, Valg af Handicapbegreber gør stor forskel i (ed. Bonfil, Kirkbæk, Olsen og Tetler) Handicapforståelser: Mellem teori og praksis. København: Akademisk Forlag

Naalagaaffiit Peqatigiit, (2008= Inuit innarluutiltipillugit isumaqatigiissut. https://tilioq.gl/wp-content/uploads/2019/11/FNs_handicapkonvention_kal.pdf

Ilisimatusarfik aamma Tilioq 2020, Innarluuteqarnermut Isummat, Tilioq. 8 Daverkosen D., 2021. 4

<https://tilioq.gl/wp-content/uploads/2020/11/Tilioq-Holdninger-til-Handicap-KA-NOV20-web.pdf>

Thuesen, F. of Salado-Rasmussen J. 2020. Kapitel 4: Selvtillid, Forskelsbehandling og fysisk rum i Thomas Bredgaard, Finn Amby, Helle Holt og Frederik Thuesen (red): Handicap og Beskæftigelse. Fra barrierer til broer. København K: Djøf Forlag.

World Health Organization, 2015, WHO Global Disability Action Plan 2014-2021, Better health for all people with disability. <https://www.who.int/publications/i/item/who-global-disability-action-plan-2014-2021>